

Акафист святым праведным Богоотцам Иоакиму и Анне

Кондак 1

Избраннии от человеческого рода прародителие Христовы, рождшии Преблагословенную Богоотроковицу, из Неяже по плоти Сын Божий родися, святии и праведнии Богоотцы Иоакиме и Анно! Яко имущии дерзновение велие ко Христу Богу и выну предстоящи Престолу Его небесному, Тому прилежно молитесь от бед нам избавитися, да выну зовем вам:

Радуйтесь, святии и праведнии Богоотцы Иоакиме и Анно.

Икос 1

Ангел предстатель послан бысть к вам от Бога, святии и праведнии Богоотцы Иоакиме и Анно, егда о бесплодии своем ов убо в пустыни, ова же в саду своем сетовасте, к Богу молитву возносяще; и тако благовестие радостное принесе безплотный, яко родити имате Дщерь Преблагословенную, о Нейже возблагословится весь род человеческий, с нимже и мы вам радостное приносим хваление:

Радуйтесь, корене Давидова святопроцветшия розги винограда животнаго; радуйтесь, рождшии Дщерь, от всех родов Преблагословенную.

Радуйтесь, воплощагося Сына Божия прародителие всечестнии; радуйтесь, таинства, от века утаеннаго, проявителие всеизряднии.

Радуйтесь, утехи Израилевы ближайшии по плоти сродницы; радуйтесь, обетованнаго миру Спасителя единокровнии южицы.

Радуйтесь, святии и праведнии Богоотцы Иоакиме и Анно.

Кондак 2

Видев себе святой Иоаким, во храме Иерусалимстем бесплодия ради от архиерея униженна, зело опечалися, и в горести души своея в пустыню к

своим стадом удалися, и тамо со многими слезами тепле ко Господу моляшеся, да сподобит его отцем своему чаду нарещися, и тако к молитве же пост прилагаше, и в сокрушении сердца Вседержителю Богу взываше: Аллилуиа.

Икос 2

Силу горести мужа своего святая Анна уведевши, в дому своем сидящи, горце плакася и моляшеся ко Господу, да поношение бесплодия от нея отымет. Мы же, толикое терпение праведных поминающе, воззовем:

Радуйтесь, богоизбранная двоице, Единому от Троицы Матерь по плоти породившая; радуйтесь, Зиждителю вашему Родительницу непорочную произведшии.

Радуйтесь, супрузи благословеннии, Преблагословенную в женах Дщерь воспитавшии; радуйтесь, в бесплодии вашем от Господа услышаннии.

Радуйтесь, яко слезныя молитвы ваша проникоша небо и во ушию Бога Израилева достигоша; радуйтесь, яко поношение ваше временное во славу вечную на небеси и на земли изменися.

Радуйтесь, святии и праведнии Богоотцы Иоакиме и Анно.

Кондак 3

Силою Божиею преисполнен, явися Ангел Господень святому Иоакиму в пустыни и рече ему: «Услыша Бог молитву твою и изволи дати тебе благодать Свою, се бо жена твоя Анна зачнет и породит тебе Дщерь, о Нейже всему миру будет радость». Сия рек безплотный, повеле ему ко храму Иерусалимскому паки отыдти, идеже он супругу свою молящуся обрящет, с неюже вкупе да воспоеет тамо хвалебную песнь Богу Израилеву: Аллилуиа.

Икос 3

Имущи скорбь велию в сердце своем Анна святая и в вертоград дома своего вшедши, виде гнездо птичье на древе сооружено, птенцы малыя в нем лежащая, абие моления к молениям прилагати потщася, да сподобит ю Господь мать чаду быти. И се явися ей ангел Господень, глаголя: «Услышана есть молитва твоя и воздыхания твоя проидоша облаки, слезы же твоя пред Бога внидоша: се зачнеши и родиши Дщерь Преблагословенную, о Нейже возблагодарятся вся колена земная, и Тою дастся спасение всему миру, наречется же имя Ей Мария». Таковое ангельское всерадостное благовещение поминающе, воспоим Богоотцем таковая:

Радуйтесь, супрузи праведнии, от Бога свыше предызбранныи; радуйтесь, во всех заповедех Господних без порока ходившии.

Радуйтесь, в скорби вашей временней утешение вечное получившии; радуйтесь, паче чаяния вашего десницею Божиею превознесеннии.

Радуйтесь, яко во смирении вашем и скорби помяну вы Господь; радуйтесь, яко сподобистесь прародителие Сыну Божию быти.

Радуйтесь, святии и праведнии Богоотцы Иоакиме и Анно.

Кондак 4

Бурею сомнения Иоаким праведный содержимь и о благовестию ему ангела недоумеая, абие во град Иерусалим отыде, идеже пред враты храма святую Анну обрете, Господа вельми славословящую и радость ангельскаго явления и о чаде проречения ему возвещающую, темже и о своем видении супружнице благовестив, вкупе с нею возопи ко Господу: Аллилуиа.

Икос 4

Слышавше сродницы и знаемии о преславном святыя Анны зачатии, Бога Израилева славляху, Анна же богомудрая плод чрева своего на служение Богу обрече, теплое благодарение Господеви возношаше; мы же светло всеславное

зачатие Богоотроковицы Марии воспевающе, Той святым родителем глаголем сице:

Радуйтесь, радостнии нам грядущаго в мир Искупителя провозвестницы; радуйтесь, присно поминаемии чаемаго Спасителя праотцы.

Радуйтесь, чрез Дщерь вашу благословенную Слово Божию плоть взаимодейавшии; радуйтесь, Бога воплощенна Внука себе нарицающии.

Радуйтесь, велией благочестия тайны достойнии служителие; радуйтесь, Божия к человеку снисхождения всеизряднии посредницы.

Радуйтесь, святии и праведнии Богоотцы Иоакиме и Анно.

Кондак 5

Богосветлую звезду явльшую Солнце Правды Христа Бога, Пресвятую Богородицу, плотию родити сподобистесь, и вожделенное имя Богоотец приясте, Иоакиме и Анно всеблаженнии, о Еяже рождестве святем небо и земля возрадовашася, и весь род человеческий освятися, вопия дивному во святых Своих Богу Израилеву: Аллилуиа.

Икос 5

Видевше родителие от них рождшуюся Богоотроковицу Марию, Зиждителиву же Матерь, яко кивоту Божию, благоговейно Той послужиша; темже и нас, к вам молитвенно припадающих, не отвратитесь, глаголющих:

Радуйтесь, в рождестве Богоотроковицы Марии светло возликовавшии; радуйтесь, видением Богоотроковицы услажденнии.

Радуйтесь, слышанием Ея умилении; радуйтесь, по сих от архиерея Божия благословении и ублажении.

Радуйтесь, Агницу непорочную в дому своем добре упасшии; радуйтесь, Агнца и Пастыря Матерь во Дщерь себе приемшии.

Радуйтесь, святии и праведнии Богоотцы Иоакиме и Анно.

Кондак 6

Проповедницы чудес Божиих явистесь святии, егда обет свой Богу совершите и трилетнюю Богоотроковицу Марию в храм Божий со славою введосте, да обитает тамо во святая святых, о сих убо радостно Богу отец ваших славословия песнь воспевати потщастесь: Аллилуиа.

Икос 6

Возсия Богоотроковица, яко луна полная, в честнем Своем в храм Господень вхождении, Еяже чистоте ангелы удивляхуся, и архиерей Божий Захария прием Ю от рук ваших, святии Иоакиме и Анно, во внутренняя святая святых с честью введе, яко воистину одушевленный Божий кивот, вас же по достоянию ублажи хваленьми таковыми:

Радуйтесь, радость всемирную роду человеческому породившии; радуйтесь, Виновницу человеческого обновления воспитавшии.

Радуйтесь, в храм Господень Кивот одушевленный Божий приведшии; радуйтесь, Дщерь вашу Святую во святая святых вместившии.

Радуйтесь, Богу, воплотитися хотящему, сродницы являющиися; радуйтесь, ангелом собеседницы бывшии.

Радуйтесь, святии и праведнии Богоотцы Иоакиме и Анно.

Кондак 7

Желание души твоя исполнив и обет твой Богу воздав, Иоакиме преблаженне, в старости добрей свято и праведно жизнь земную о Господе скончал еси. Темже ныне Тому и о нас сотвори молитву, да благую, мирную и непостыдную кончину получитьи сподобимся, зовуще Ему: Аллилуиа.

Икос 7

Новое и богоугодное житие во вдовстве твоём, Анно святая, провождала еси, у храма Божия приметающися и Святей и Преподобней Дщери твоей сослужащи, темже яко истинную и богоугодную вдовицу, Христову же прабабу, ты восхваляем, вкупе же и мужа твоего, Богоотца Иоакима, усердно чествуем и с любовию песни таковыя вам приносим:

Радуйтесь, праведницы, ихже правда, яко солнце, сияет во веки; радуйтесь, Ангелом друзи, сожителие святым и приснии Богу.

Радуйтесь, ближнии небеснаго Престола предстоятелие; радуйтесь, дерзновение велие ко Христу Богу имущии.

Радуйтесь, Церкви, на небеси торжествующия, украшение; радуйтесь, Церкви, воинствующия на земли, доброе заступление.

Радуйтесь, святии и праведнии Богоотцы Иоакиме и Анно.

Кондак 8

Странствие земное совершив, святая и праведная Анно, на руках Преподобней твоей Дщери, Богородицы Марии, сном смертным почила еси и к Богу со упованием преставилася еси, темже святое успение твое славяще, молим тя, о Богопраматерь всечестная, да егда и мы сном смертным усыпати начнем, умоли Спаса Христа кротко душу нашу от тела отделить и бесовския власти ю избавити, спасения же вечнаго нас удостоити, да зовем Ему в радости святых: Аллилуиа.

Икос 8

Весь мир христианский блажит вас по достоянию, святии и праведнии Богоотцы Иоакиме и Анно, и молитвенно ваша честная имена прославляет, Церковь же Христова светло память вашу празднует и песни хвалебныя вам приносит сие:

Радуйтесь, светильницы, мрак душ наших благодатно озаряющие; радуйтесь, от горних высот славы вашей к земнородным милостиво проникающие.

Радуйтесь, Богородице Марии сомолитвенницы всегдашней; радуйтесь, Христа Бога умиловителю и многомогущей.

Радуйтесь, любовь и веру к вам имущих от всяких бед спасающие; радуйтесь, молитвенно на помощь вас призывающих от напрасныя и наглыя смерти избавляющие.

Радуйтесь, святые и праведные Богоотцы Иоакиме и Анно.

Кондак 9

Все ангелы Божии и лица святых Божиих на небесах вас, святые и праведные Богоотцы Иоакиме и Анно, целуют, род же человечества на земли молитвенными песнями вас похваляют и о предстательстве вашем благодарно вопиют Богу: Аллилуиа.

Икос 9

Витийства наша не довлеют к достойной вам похвале, святые прародителие Христовы; обаче вы, милостивые суще, и наша убогая хваления не отвратите, но будьте о нас теплые предстатели и молитвенницы ко Господу, вашими святыми молитвами скудость душ наших восполняюще, да благодарственне вам зовем:

Радуйтесь, радости и славы вечныя вожделеннии нам стяжателие; радуйтесь, благ временных и вечных усерднии нам пред Господом ходатаи.

Радуйтесь, от смертоносныя язвы предстательством вашим верныя сохраняющие; радуйтесь, тлетворныя ветры молитвами вашими разгоняющие.

Радуйтесь, трясение земли и бури зельныя ходатайством вашим установляющи и в тишину прелагающи; радуйтесь, во всяких бедах и злоключениих на помощь к нам ускоряющи.

Радуйтесь, святии и праведнии Богоотцы Иоакиме и Анно.

Кондак 10

Спасения душевнаго желающим и о сем усердно подвижающимся, помощницы блазии, святии и праведнии Богоотцы Иоакиме и Анно, явистесь, овубо иноком, ова же инокинем хранители именуется, общее моление за всех верных Богу приносяще, да вси благодарственно зовут прославльшему вас во вселенней, Царю славы Христу: Аллилуиа.

Икос 10

Стеною молитв ваших небесных, святии и праведнии Богоотцы Иоакиме и Анно, сохраняйте и ограждайте нас от искушений врага диавола, ищущаго душевней погибели нашей: вемы бо, вемы, яко много может молитва ваша пред лицом Христа Бога нашего, вашего же по плоти Внука. Егоже умоляти не престайте о всех, с любовью вас почитающих и вопиющих:

Радуйтесь, маслина благоплодная, елей милости Божией обильно нам источающая; радуйтесь, кипариси двое благосеннолиственнии, зной страстей наших в покой безстрастия приводящи.

Радуйтесь, виссоне и багрянице, из нихже Скиния Божия селения соорудися; радуйтесь, горлицы единосупружнии, Голубицу непорочную произведшии.

Радуйтесь, со Дщерию вашею, всех Царицею, вечно царствующи; радуйтесь, в Сионе горнем в обители Ея небесней светло торжествующи.

Радуйтесь, святии и праведнии Богоотцы Иоакиме и Анно.

Кондак 11

Пение наше хвалебное милостивно примите и щедрот ваших молитвенных нас не лишите, о святии прародителие Христовы Иоакиме и Анно, аще и недостойнии есмы, грехов ради наших, вашего святого заступления: обаче яко блази и всещедри суще, сие нам подадите, и помозите нам покаянием очиститися от скверны греховныя, да в чистоте сердец воспоем Создателю нашему хвалебную песнь: Аллилуиа.

Икос 11

Светоподательная два светильника, всемирную Свещу возжегшии, познаим святых Богоотец Иоакима и Анну, о братие, и сиянием тех небесныя славы озаряеми, воспоим им таковая:

Радуйтесь, славнейшую без сравнения Серафим воспитати удостоившиися; радуйтесь, лучами благодати Божия осиянии.

Радуйтесь, благоухания духовнаго преисполненнии; радуйтесь, фимиам молитв ваших о всем мире христианством Богу приносящии.

Радуйтесь, с Богородицею Мариєю и Предтечею Иоанном у Престола Христова выну предстоящии.

Радуйтесь, святии и праведнии Богоотцы Иоакиме и Анно.

Кондак 12

Благодать Божию и милость нам подати, прощение же грехов и исправления жития ниспослати просите нам у Господа, святии Богоотцы Иоакиме и Анно, и не престайте о нас пред лицом Вседержителя Бога моляще, яко стяжавшии к Нему дерзновение многое. О сем усердно к вам припадающе, яко присных предстателей и заступников наших, просим и благоумиленно зовем всех Творцу: Аллилуиа.

Икос 12

Поюще многомощное предстательство ваше к Богу, Иоакиме и Анно праведнии, величаем возвеличившаго вас Христа Господа, воспеваем и рожденную от вас Пренепорочную Его Матерь, вам же от усердия нашего сия достодолжная похвалы приносим:

Радуйтесь, от востока и до запада препрославлению; радуйтесь, стражие божественнии, неусыпно бдящии в молитвах к Богу о всех верных.

Радуйтесь, помощь вашу благодатную всяцей душе христианстей подающии; радуйтесь, во благих моления и прошения благочестивых исполняющии.

Радуйтесь, душевных и телесных недугов преизряднии и безмезднии целители; радуйтесь, благ временных и вечных всеусерднии и благоприятнии нам ходатаи.

Радуйтесь, святии и праведнии Богоотцы Иоакиме и Анно.

Кондак 13

О святии и праведнии Богоотцы Иоакиме и Анно! Молим вас со усердием и любовью, к подножию ног ваших припадающе: умолите Господа Бога избавити нас от погибели вечная, грешником уготованная, да милосердием Бога нашего спасаеми и вашими святыми молитвами споспешествуеми, благодарственно воспоем Ему ангельскую песнь: Аллилуиа.

Этот кондак читается трижды, затем икос 1-й «Ангел предстатель ...» и кондак 1-й «Избраннии от человеческого рода ...».

Молитва

О приснославнии Христовы праведницы, святии Богоотцы Иоакиме и Анно, предстоящии небесному Престолу Великаго Царя и велие дерзновение к Нему

имуции, яко от Препоблагословенныя Дщери ваша, Пречистыя Богородицы и Приснодевы Марии, воплотитися изволившему, к вам, яко многомошным предстателем и усердным о нас молитвенникам, прибегаем мы, грешнии и недостойнии. Молите благость Его, яко да отвратит от нас гнев Свой, по делом нашим праведно на ны движимый, и да безчисленныя прегрешения наша презрев, обратит нас на путь покаяния и на стезе заповедей Своих да утвердит нас. Таже молитвами вашими в мире живот наш сохраните и во всех благих благое поспешение испросите, вся яже к животу и благочестию потребная нам от Бога дарующе, от всяких напастей и бед и напрасныя смерти предстательством вашим нас избавляюще, и от всех враг видимых и невидимых защищающе, яко да тихое и безмолвное житие поживем во всяком благочестии и чистоте, и тако в мире временное сие житие прешедше, в вечный достигнем покой, идеже вашим святым умолением да сподобимся Небеснаго Царствия Христа Бога нашего, Емуже со Отцем и Пресвятым Духом подобает всякая слава, честь и поклонение во веки веков. Аминь.

Тропарь, глас 1

Иже в законней благодати праведни бывше, Младенца Богоданнаго породиша нам Иоаким и Анна: темже днесь светло торжествуем, весело празднующи, Божественная Церковь честную вашу память, славящи Бога, воздвигшаго рог спасения нам в дому Давидове.

Кондак, глас 2

Радуется ныне Анна, неплодства разрешившися союз, и питает Пречистую, созывающи вся воспети Даровавшаго от чрева ея человеком едину Матерь и Неискусомужную.